

Date – 28/01/2026

Time - 18:30 -18:40Hrs

AKASHVANI AIZAWL
REGIONAL NEWS BULLETIN

HEADLINES (EVENING)

1. National Startup Day Mizoram Edition lawmna vawiina Aijal Club-a neihah Chief Minister Pu Lalduhoman Mizoram Bana Kaih Venture Capital Fund leh Startup Readiness Level of Mizoram a tlangzarh.
2. MZP-in zirna in leh zirlaite inkarah thiamna tak tak a lanchhuah theihna turin pawl 10 leh 12 board exam result bua tarlan loh aiin, exam kalphung leh zawhna siam dan ngun taka ennawn zawk turin sorkar an ngen.
3. Serchhip Dist a Chhuanthar leh Baktawng khua Furniture Workshop ten mipui hriselna tichhe lo zawnga hna an thawh theih dan tur ruahmanna siam a ni.
4. President Droupadi Murmu-i chuan mitinin nitin khawsaknaah an chanvo diktak an neih theih nan theihtawp a chhuah a ti.

<><><>

CM

Planning & Programme Implementation hnuaia Mizoram Startup Mission leh Department for Promotion of Industry and Internal Trade (DPIIT) bultumin National Startup Day Mizoram Edition lawmna Aijal Club-a buatsaih a ni a. He hunah hian Chief Minister Pu Lalduhoma chuan Mizoram Bana Kaih Venture Capital Fund leh Startup Readiness Level of Mizoram a tlangzarh.

Thusawiin Chief Minister chuan, kum tam tak chhung chu Mizoramah thiamthil leh ngaihtuahna tha tak tak nena sumdawnna bei an lo awm tawh thin a. Nimahsela, thlawpna leh puihna an hmuh that loh avangin an sumdawnna a thang thei lo va, an suangtuahna a tak ramah a chang thei lo thin a. He Bana Kaih Venture Capital Fund hian chutianga harsatna an tawh thin chu a rawn su kiang dawn a ni a ti.

He fund hi sumthlawnpek a ni lo va, rinna leh inrintawnna nena sum peipunna a ni tih sawiin. Entrepreneur hma hun êng tak nei leh thang zel tura theihna nei, eizawnna bultantute a pui dawn a, a bik takin heng — sumdawnna kalphung tha, thang thei tur leh danglam bik ngaihtuah chhuak thei te, kut themthiamna lam hawi leh industry dina thilsiam chhuak duh te leh tunlai thiamnaa innghata eizawnna siam duh te a tinzawn ang a ti.

MSUM CEO Pu Lalrinzuala chuan Bana Kaih Venture Capital chungchang sawifiahin hemi atan hian cheng vbc 100 dah a ni a ti a, sorkarin Bana Kaih atangin cheng vbc 20 Cr pek a tiam a. A dang chu kawng dang atanga hmuh tum a ni. Pool fund a nih angin Security Exchange Board of India (SEBI) ah trust registration neih a ngai a, Senhri Investment Fund tia register a ni. Operating partner tur company dang thawhpui a ni bawk. SEBI hnuaia register a nih angin India ram ngaihtuah chungka kalpui a tul a, a tum bul ber erawh chu Mizoram entrepenuer-ten bul an tan nan emaw hma an sawn zelna tura hma an lakna tur sum, dan ang thlapa tumpui a ni. DPIIT hnuaia registered startup ten an dil thei a, chutiang registered startup chu 42 chauh Mizoramah an la awm avangin a dil thei hi neih tam a tul hle nia sawi a ni.

He hunah hian Mizoram Outstanding Entrepreneurs & Startups Award 2026 sem a ni a, Mizoram Outstanding Entrepreneurs & Startups Award 2026 – Ecosystem Enabler lawmman Dr. C. Vanlalramsanga, IES hnenah hlan a ni.



LADC

Lai Autonomous District Council 12 na a Sorkar thar piang chho mek ah vawiin khan LADC Chairman atan South Lungpher bialtu MDC, Congress Member Pu C.Lalmuanthanga thlan a ni.

LADC 12 na a Session hmasaber vawiin a neih hi Protem Chairman Pu C.Hrangthrianga'n kaihhruaiin, LADC Chairman thlanna neih a ni a, Rorellai United Legislature Party atanga Chairman chuhtu Pu C.Muanthanga chu thlan tlin niin, Chairman thar hian Session a kaihruai zui nghal.

Pu C.Lalmuanthanga chuan Pathian leh Member te duhsakna changa Lairama rorelna sang ah Chairman dinhmun a luahthei chu lawmawm a tih thu sawiin, finchhuah a ngaihna ah mamah finchhuah hrelo turin Member te a sawm.

Chairman thar hi House Leader Pu C.Lalsawmzuala bakah Pu T.Zakunga leh Pu C.Ngunlianchunga ten duhsakna an hlan thu House ah an sawi a, Chairman thar hian vawiin khan a Office a luahthei nghal.

Ruahmanlawk dan chuan nimin a Chief Executive Member atana lakluh tak Pu C.Lalsawmzuala'n thlawptu a neihdan chu Chairman thar kaihhruaina hnuaiah naktuk khian fiah a ni ang.



MZP

Mizo Zirlai Pawl MZP-in zirna in leh zirlaite inkarah thiamna tak tak a lanchhuah theihna turin pawl 10 leh 12 board exam result bua tarlan loh aiin, exam pattern leh question siam dan ngun taka ennawn zawk turin thuneitute an ngen.

Vawiina MZP President Dr. C. Lalremruata hova MZP General Headquarters Executive Committee Meeting vawi 649-na neihah Mizoram sorkar in a By-heart system tihbo nan a HSLC leh HSSLC Top-10 leh Division tarlan a nih tawh loh tura ruahmanna an siam chungchang an sawiho a, Mizoram sorkan hmalakna thar tur chu ngun taka ngaihtuah tha a, zirlaite leh zirnain inkarah inelna thianghlim zawk a awm zel theihna turin Top-10 tarlang leh turin leh, zirna in leh zirlaite inkarah thiamna tak tak a lanchhuah theih nan exam pattern leh question siam dan chu ngun taka ennawn zawk turin thuneitute a ngen a ni.

Hei bakah hian Forest Conservation Amendment Act, 2023 (FCAA) chu Mizoram leh hnam tana thalo leh Mizo hnam kal zel tur atana himlo a nih avangin Mizoram Assembly in he dan hman theiha a lo pasd tawh chu sut leh ngei turin MZP chuan thuneitute an ngen a, Mizoram University Finance Officer tunhnaia lak chungchang pawh ngaihtuahin, Mizoram a zirna in sang berah dan palzut na tam tak awma hnalak a ni chu hriatthiam har an tih thu sawiin, hetiang thil hi a thlen nawn tawh loh na tur leh MZU zahawmna humhim a nih theihna turin MZP chuan a tul angin hmalak a rel a. Mizoram-a Central Institution hrang hrangte chu dan dik taka hnalak kalpui thin turin an ngen bawk a ni.



HM

Home Minister Pu K.Sapdanga leh Information & Public Relations Minister Pu B. Lalhhanzova te chuan kumin Republic Day lawmna inkhawma chanchinbumite telloh chhan leh an lungawilohna te sorkar official te a sawi pui a

Home Minister Pu K.Sapdanga chuan Republic Day lawmna inkhawm leh “Governor’s At Home” a tel lova, chanchinbumite’n lungawi lohna leh harsatna an nei chu pawl a tih thu sawiin, Republic Day leh Independence Day-ah Media enclosure siam ziah tawh nise an ti a, sawmna semchhuah chungchangah pawh fimkhur lehzuala kalpui nise an ti bawh.

He hunah hian IPRP&S Secretary Pi Betsy Zothanpari Sailo, Aizawl Bawrhsap Pu Lalhriatpuia, State Protocol Officer Pu Lalmuansanga Ralte, DIPR Joint Director pahnih – Pi Mina Zoliani Joute leh Pu Malsawmsanga, DIPR Deputy Director Pu Andrew H. Lalremruata te an tel a ni.



CHHUANTHAR FURNITURE

Serchhip Dist a Chhuanthar leh Baktawng khua Furniture Workshop ten mipui hriselna tichhe lo zawnga hna an thawh theih dan tur ruahmanna siam a ni a,

Vawiin khan Serchhip DC Pu Paul L Khuma hoin Serchhip DC Meeting Hall-ah Baktawng leh Chhuanthar khuua furniture workshop ten a chhehvela cheng mipuite hriselna atana harsatna an siam thu report theihluh chungchangah inrawnkhawmna neih a ni a. Serchhip SP Pu Gavit Gogna leh mi pawimawh dangte an tel.

Sr. CMO Dr LP Malsawma chuan air pollution avanga mihring hriselna chhiat theih dan te sawiin, Health worker te pawhin Chhuanthar naupang ten hritlang awmna an vei rei bik tih an report thu a sawi a. Furniture workshop atanga boruak thalo in a thlen a ni thei em tih chu finfiahna awm rih lo mah se, thil awm thei a nih thu a sawi. Meeting-ah hian Baktawng leh Chhuanthara furniture workshop neitute koh tel niin an eizawnnain mipuite hriselna a nghawng thei tih chu an inpawm thu leh, theih ang anga inkaihhruaina pawh an siam thin thu an sawi a ni.

He harsatna tawh mek chinfelna tur hian meeting chuan uluk taka inrawnkhawmna an neih hnuah Industrial Vacuum Cleaner chu society anga hman ni se; Chhuanthar MPACS lam hian 3 an dawn tawh chu hmang tan nghal se, an ti a. Baktawng chu Industrial Area-a puan a nih vat theih nan thuneitute hma la tura ngen an ni a, industrial area -a puan chin huamchhungah mihring chen khap tlat ni se, tih a ni bawk.

He harsatna chinfel a nih theih nan leh mipui hriselna atana him tur inzirtirna kawngah chak taka hma la turin Baktawng leh Chhuanghar VC te leh Society hruaitute chu ngen an ni a. District Administration chuan tih tur leh tihloh turte kimchang taka ziakin Prohibitory Order a tichhuak dawn bawk a ni.

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



REIEK TOURISM BOOST

Mizoram Rel a lo luh atangin khualzin an pung nasa hle a, Reiek tlang tlawhtu pawh nasa takin an pung.

Kan corr thudawn danin, Gate vengtu ten an chhinchhiah danin nikum December thla khan mikhual 17000 vel awmin nichhuak en tur nitin mi 500 vel leh tlai ni tla tur en leh puaninkaih a riak leh home stay a thleng engemawzah an awm a, Reiek khua tlawh hrim hrim chhinchhiah loh te nen mi 20,000 vel an tling a ni.

Gate pui bul a Green Hill Restaurant neitu Pu Sangpuia chuan gate paltlang man hi puitlingah Rs 30 leh naupangah Rs 20 ani tih sawiin motor 5/6 vel service a awm bawk a ti a, Gate luhman atanga sum hmuh hi an khawtlang cheibawl nan hman thin a ni a ti. Hetihrial hian a panna kalkawng chhe lutuk chu Sorkar in siam tha thei se an duh tih sawiin kawng a chhiat chuan lirthei hman man a to a, hei hian Tourist te a hnar phah a hlauhthawnawm a ni a ti.

Reiek khawtlang chuan he tlang hi theihtawp a enkawlin chhungkaw engemawzat in eizawn nan an hmang mek a ni. Mikhual riahna leh chaw ei tur te, hmawmsawm chi hrang hrang leh intur, zupui leh zufang te, lirthei a hruai kual vel tu te awmin sum engemawzah an la lut a ni.



VIGILANCE SECY

Sorkar hmasawnna hnathawh viltu, Vigilance Secretary Pu YLN Reddy chuan Serchhip a tlawh a, sawkar department ten mipuite lungawilohna thlenna leh chinfel dan tur grievance edressal mechanism an neih te chhinchhiah leh vawn that kawngah an chak lo fo thin, a ti a. Tha taka documentation siam a tul thu leh sawrkar laipuah data thehluh a tul pawha hman tangkai theih tur record tha vawn a tul a ti.

Meeting DC Pu Paul L Khuma kaihhruaiah hian Additional DC Pu Lalrinzuala leh DC Office a officer te an tel a. Mipuite tana tangkai, awm ze nei leh tha zawka hnathawh dan tur sawihona hun hman a ni a. SDC Pu Vanthangpuia chuan Vantlang Viltu, CPGrams, Mipui Aw leh District Plan and Project Monitoring System (DPPMS) chungchang a sawifiah bawk.

Vigilance Secretary Pu YLN Reddy hian vawin vek khan Serchhip chhuahsanin Aizawl a pan a ni.

<><><>

PRESIDENT

President Droupadi Murmu-i chuan mitinin nitin khawsaknaah an chanvo diktak an neih theih nan theihtawp a chhuah thu sawiin mi rethei vaibelchhe 25 chuang kum 10 kalta chungin chawikan an ni a ti. Vawiina Parliament Budget session inkhawm tan ni ah house pahnih member thukhawm hmaah he thu hi sawiin sawrkarin term thumna a hman mekah hian mi retheite dinhmun chawikang turin chakna thar nen hmalak a ni a ti a. Kum 2014 ah khan social security scheme ten khua leh tui vaibelchhe 25 chauh a thlen phak lain sawrkar tan lakna a zarah tunah chuan vaibelchhe 95 in social security scheme te hi an dawng tawh a ni a ti bawk.

Byte)

Operation Sindoor chungchang sawilangin sipaite fakawm a tih thu a sawi a. Ramin a neih hmanruate hmangin firfiakte inkulhna hlawhtling taka tihchhiat a ni a ti bawk.



AJIT PAWAR

Maharastra Deputy Chief Minister Ajit Pawar chu tukin khan Maharastra-a Baramati ah thlawhna chesualah a thi. Union Civil Aviation Ministry sawidanin VSR enkawl Learjet 45(VT-SSK) chu tukin khan Baramati airport ah a chesual a. Thlawhnaah hian mi panga chuangin an zingah hian Maharastra Deputy CM Ajit Pawar leh amah zuitu mi pahnih bakah thlawhna enkawltu midang 2 an chuang a. Thlawhna chesualah hian damchhuak an awm lo tih sawrkar chuan a puang a ni. President Droupadi Murmu, Prime Minister Narendra Modi, Lok Sabha Speaker Om Birla, Union Home Minister Amit Shah, Defence Minister Rajnath Singh leh Union Information and Broadcasting Minister Ashwini Vaishnaw te chuan thlawhna chesuala Ajit Pawar a thi chu pawl an tih thu an sawi a. Ramchhunga hruaitu hrang hrangten pawl an tih thu hi an sawi bawk a ni.



PRAGATI

Prime Minister flagship programme Pro-Active Geovernance and Timely Implemetation,PRAGATI chuan mellung pawimawh tak phunin a tum 50 na inhmuhkhawm hlawhtling takin a nei. He programme hi PM Modian kum 2015 a bul a tan atangin sawrkar inrelbawlna leh hnathawh dana inthlak danglamna tam tak a thleng a. Sawrkar hnathawkte hna thawh dan chu a hunlai ngeia vil a ni a, Prime Minister hoa thlirletna hun hman thin niin hetah hian hmasawnna ruhrel pawimawh tak tak te pawm niin mipuiten lungawilohna an thlente pawh enfiah nghal a ni a thin a. Kum 10 chhungin PRAGATI hian sawrkar thutlukna pawimawh tak takah nasa takin a pui a, hmasawnna hna thawh tikhawtlai thinte chin fel niin sawrkar hnathawkte rintlak lehzuala siam an ni.

PRAGATI hnuaia hmalakna langsar tak chu Uttar Pradesh-a 6 lane kawngpui Chakeri atanga Allahabad inkar NH-2 Section hi a ni a. He 6 len kawngpui hi tunah chuan NH-19 ah a tel tawh a. Ramchhunga inkalpawhna kawngpui pawimawh berte zinga mi a ni a. Km 145 a thui niin Union Ministry of Road Transport and Highways hnuaia hmalak a ni a. Kum 2017 khan hnathawh tur hi tihfel tawh a ni a. Kawngpui pawimawh tak anih rualin a siamna lamah harsatna chi hrang hrang a tawk a. Hna thawh zawh mai theih anih loh hnuah Prime Minister Modia hoin PRAGATI hnuaia thlirho a ni a. Hemi hnu hian harsatna te chinfel niin kum 2024 August thla khan mipuite hman theih tura hawn a ni a. Cheng vaibelchhe sang li leh 850 sengin he kawngpui siam a ni.

